

Ka Huaka'i 'Ana i Ka Papa Lo'i 'O Kānewai

Ka Papa Ha'awina No Ke Kumu A'o

Nā Mana'o Nui

He huaka'i kēia e maopopo ai...

- Pili ka 'āina mai uka a i kai a pili nō ho'i ka 'āina a me ke kai.
- He mo'olelo a he mo'okū'auhau ko ka 'āina, ka wai, nā akua, a me nā kānaka.
- Pili ka 'āina, ka wai, nā akua, a me nā kānaka a he pilina 'ohana nō ia.
- He mea nui ka 'ike maka a lohe pepeiau 'ana i ka 'āina i maopopo nā mea e pono ai ka 'āina.
- E hana kākou me ka maiau i ma'ema'e ka hopena.

Nā Kumu 'Ike

- ke kahua kamepiula a Ka Papa Lo'i 'O Kānewai (kanewai.ning.com)
- nā ki'i kahiko a me nā palapala 'āina

#1 "Manoa Valley, Honolulu, Hawaii, ca. 1890-1905," Located at Bishop Museum Library & Archives, # CLS101950.

#2 "Inter-Island Airways plane over Manoa Valley, Honolulu, Hawaii, ca. 1934-1937," Located at Bishop Museum Library & Archives, # CP 99266

#3 "Taro as far as the eye can see, in Mō'ili'ili, circa 1910," Waikīkī: Magic Beside the Sea, Allan Seiden, Island Heritage Publishing, Waipahu, Hawaii: 2001, page 43.

#4 "Fields and Diamond Head in Background, circa 1900" Located at Hawaiian Collection, UH Manoa Hamilton Library, # UH Manoa Hamilton Hawaiian Rare PHOTOGRAPH H00034.

#5 "Manoa Valley from the Ala Wai, Honolulu, Hawaii, ca. 1930," Located at Bishop Museum Library & Archives, # 115439

#6 "Manoa Valley looking toward Diamond Head (right corner), taken from home of Mrs. S.N. Castle, Honolulu, Hawaii, ca. 1900," Located at Bishop Museum Library & Archives, # A 36787.

#7 Ka Papa Lo'i o Kanewai Brochure" Located at Hawaiian Collection, UH Manoa Hamilton Library, Manoa Valley Papers Archive, Box 1 Folder 12.

Ma Mua o ka Huaka‘i

- E heluhelu nā haumāna i ka palapala ha‘awina ‘o Welina Mānoa no Ka Papa Lo‘i ‘O Kānewai i launa mua ‘ia ka wahi e kipa ana a i maopopo ke ‘ano o ka ha‘awina e hana ana ma laila.
- E nānā paha i ka palapala ha‘awina ‘o Welina Mānoa i ho‘omōhala ‘ia no nā ‘ohana a me nā keiki i piha ai nā makahiki he ‘ewalu (a emi iho) e pili ana i Ka Papa Lo‘i ‘O Kānewai i launa mua ‘ia ka mo‘olelo no kēlā wahi.
- E nānā paha i nā palapala ‘āina i maopopo kahi e hele ana a me kona pilina i nā wahi ‘ē a‘e o Mānoa i kipa ‘ia ma mua a e kipa ana ma hope.

E Maka‘ala

Ma ka papa ha‘awina, ...

- **Uliuli** nā ‘ōlelo i ke kumu.
- ‘**Ele‘ele** nā ‘ōlelo a ke kumu i nā haumāna.

Ka Huaka‘i

9:00am - 9:30am

E hui me nā limahana o Ka Papa Lo‘i ‘O Kānewai i ka hale pili no ka launa ‘ana me Kānewai ma o nā mo‘olelo a me nā mo‘okū‘auhau o ka ‘āina a me nā kānaka o ia ‘āina.

Nā mana‘o nui e kālele ai:

- Pili ka ‘āina mai uka a i kai a pili nō ho‘i ka ‘āina a me ke kai. ‘O ka wai ka mea e pili ai. He mea nui kēia i nā mahi ‘ai kalo, no ka mea, ho‘ohana lākou i ka wai a inā ‘a‘ole mālama pono ‘ia ka wai ma uka, e pilikia ana ko kai.
- He mo‘olelo a he mo‘okū‘auhau ko ka ‘āina, ka wai, nā akua, a me nā kānaka. Aia ka ‘āina, ke kalo, a me ko Hawai‘i lāhui kanaka i ka mo‘okū‘auhau like. ‘O ka ‘āina a me ke kalo nā kaikua‘ana a ‘o ke kanaka ke kaikaina. Mālama ka ‘āina i ke kanaka a mālama pū ke kanaka i ka ‘āina i pono nā mamo a Hāloa.
- Pili ka ‘āina, ka wai, nā akua, a me nā kānaka a he pilina ‘ohana nō ia. Ma Ka Papa Lo‘i ‘O Kānewai kākou e hui hou ai me Hāloa, ke kalo a me ka makua ali‘i o nā kānaka maoli o Hawai‘i. A ma laila ho‘i kākou e ho‘ōia hou ai i ko kākou pilina ‘ohana me ia a me ko kākou kuleana e mālama iā ia.
- He mea nui ka ‘ike maka a lohe pepeiau ‘ana i ka ‘āina i maopopo nā mea e pono ai ka ‘āina. Na ka ‘āina a me nā kūpuna o ka ‘āina e hō‘ike i nā hana a me nā lōina kūpono e hana ai, no laila, e hāmau ka leo, e ho‘olohe ka pepeiau a e maka‘ala i ‘ike a lohe ‘ia lākou a i pā ka na‘au iā lākou.
- E hana kākou me ka maiiau i ma‘ema‘e ka hopena. Pēia nā kūpuna. ‘A‘ohe hana pono i hana kāpulu ‘ia. ‘O ka maiiau wale nō ke ‘ano o ka mālama kūpono ‘ana. Ma ka mo‘okū‘auhau o Kānewai, mai ka ho‘omaka a hiki i kēia manawa ‘ānō, ua maiiau ka hana a ka po‘e limahana o ‘ane‘i. He kuleana ko kākou e ho‘omau i kēia ‘ano hana a nā kūpuna a me nā limahana o Kānewai.

E Ho‘okuleana a Ho‘opa‘ana‘au!

E wehewehe i nā haumāna— Eia kākou i ka ‘ili ‘āina ‘o Kānewai i ke ahupua‘a ‘o Waikīkī. ‘O Ka Papa Lo‘i ‘O Kānewai ka inoa o kēia kīpuka a pu‘uhonua ho‘i o Ke Kula Nui o Hawai‘i ma Mānoa. Ma ‘ane‘i i ‘eli ai ‘o Kāne i ka pūnāwai no Kanaloa. Ma ‘ane‘i e ulu ai ka hoi o nā haumāna e aloha ‘āina a e ‘ōlelo Hawai‘i. Ma ‘ane‘i e ho‘okahe ‘ia ai ka wai a e ho‘oulu ‘ia ai ka ‘āina. I wahi kēia e ola ai nā mamo a Hāloa, ‘o ia ho‘i ke kalo, ka mo‘olelo, ka ‘ōlelo, a me ke kanaka Hawai‘i.

Ka Papa Lo‘i ‘O Kānewai (ka papa ha‘awina no ke kumu a‘o)

Aia ma lalo nei kekahi o nā mea e ha‘i ai paha i nā haumāna i launa lākou me Kānewai a i a‘o ‘ia nā mana‘o nui o ka ha‘awina. E hō‘ike pū i nā ki‘i kahiko o ka ‘āina a mai poina ka ho‘opili ‘ana i nā mea i a‘o ‘ia ma ka Hale Hō‘ike‘ike I‘a i nā mea e a‘o ana ma ka Papa Lo‘i ‘o Kānewai

No Kāne me Kanaloa

Ua kaulana ‘o Kāne i kona ‘imi ‘ana i wai maoli me kona kōko‘olua ‘o Kanaloa. ‘Ōlelo ‘ia, iā lāua e hele ana ma lalo o Wa‘ahila ma hope o ko lāua kipa ‘ana i kahaone, lohe ‘o ia i ka wai e holo ana ma lalo o ka honua. Ki‘i a‘ela ‘o Kāne i kāna ‘ō‘ō a ‘ō akula i ka honua. ‘O ka pua‘i maila nō ia o ka wai maoli hu‘ihu‘i o kahi pūnāwai nui. I laila lāua i inu ai i ka wai a me ka ‘awa. Ua kapa ‘ia ia pūnāwai a Kāne i ‘ō aku ai i kāna ‘ō‘ō ‘o Kānewai ka inoa.¹

No Hāloa

‘O Wākea ke kāne. ‘O Papahānaumoku ka wahine. He mau akua lāua a he mau kūpuna nō ho‘i no kākou, ka po‘e Hawai‘i. Noho pū lāua a hānau maila nā mokupuni o Hawai‘i nei a me kekahi kaikamahine. ‘O Ho‘ohōkūkalanani kona inoa. Noho pū ‘o Wākea me ia a hānau maila he keiki ‘alu‘alu. Ua kanu ihola nā mākuia i kā lāua keiki i ka ‘āina a kupu maila ke kalo mua o Hawai‘i nei. ‘O Hāloanakalaukapalili kona inoa. He kalo lauloa ke ‘ano. Ho‘i hou ‘o Wākea, noho iā Ho‘ohōkūkalanani a hānau maila he keiki kāne. ‘O Hāloa kona inoa. A ‘o ia ka makua ali‘i o nā kānaka maoli o Hawai‘i, nā mamo ho‘i a Hāloa.

Aia ka ‘āina, ke kalo, a me ko Hawai‘i lāhui kanaka i ka mo‘okū‘auhau like. ‘O ka ‘āina a me ke kalo nā kaikua‘ana a ‘o ke kanaka ke kaikaina. Mālama ka ‘āina i ke kanaka a mālama pū ke kanaka i ka ‘āina i pono nā mamo a Hāloa. He kuleana ko‘iko‘i kēia no kākou a pau.

No Ho‘okahe Wai, Ho‘oulu ‘Āina

‘Okō‘a ka ‘ili ‘āina ‘o Kānewai i kēia au, ‘oko‘a i ka wā kahiko. I ka holo ‘ana o nā makahiki, uluāhewa kahi o ka papa lo‘i i ka nāhelehele a uhi ‘ia nō ho‘i i ke kimeki. I ka makahiki 1980 na‘e, ua ulu nō ka hoi o nā haumāna kula nui i ka ua Tuahine e ho‘i i ka ‘ike kupuna no ka pono o ka lāhui. Ua ‘imi a loa‘a akula nā ‘auwai a me nā kuāuna kahiko i kekahi mau haumāna o ka Hui Aloha ‘Āina Tuahine, ka hui ‘ōlelo Hawai‘i o Ke Kula Nui o Hawai‘i ma Mānoa. Me ke kōkua a alaka‘i ‘ana o nā kūpuna, e like me ‘Anakala Harry Kunihi Mitchell, lākou i waele akula i ka nāhelehele, i ho‘okahe hou akula i ka wai, a i kanu hou ihola iā Hāloa. Ma muli o ko lākou aloha ‘āina, ua kapa ‘ia ia hui ‘o *Ho‘okahe Wai, Ho‘oulu ‘Āina*.

‘A‘ole like ka nui o ka wai a me ka ‘ai o Kānewai i kēia manawa me ko ka wā i hala, akā na‘e, pau ‘ole ke aloha no kēia ‘ili waiwai. Mahalo nui ‘ia nā haumāna a me nā kūpuna i ho‘ōla hou i ka papa lo‘i kalo o Kānewai. I ‘ole lākou, mau loa ai kēia pu‘uhonua i aloha nui ‘ia.

¹ *Ua kākau hou ‘ia kekahi māhele o ka mo‘olelo a Kaulana Vares i hō‘ano ai.*

No Maiiau me Ma‘ema‘e

- Na ke kumu e kālele i ia mea he hana maiiau a ma‘ema‘e ‘oiai e ho‘olauna a ha‘i mo‘olelo ana ka limahana o Kānewai i mākaukau nā haumāna no ka ha‘awina, e la‘a...
 - Maiiau ka ha‘i mo‘olelo ‘ana a Kumu _____, ‘eā?
 - E nānā i ka nani o ka ‘āina ‘o Kānewai i loko lilo o ka nui o nā hale a me nā alanui. Maiiau ka hana a nā limahana o Kānewai, ‘eā?
- Ma hope o ka ho‘olauna ‘ana o ko Kānewai, e noi ke kumu i nā haumāna e no‘ono‘o e pili ana i ‘elua nīnau no ka hana maiiau a ma‘ema‘e.
 - Pehea ko ‘oukou mau mana‘o no “maiau a me ma‘ema‘e”?
 - No ke aha he mea nui ka hana maiiau a ma‘ema‘e ma ka lo‘i kalo?
- Ma mua o ka puka ‘ana i waho o ka hale pili, e hō‘ike nā haumāna i ko lākou mau mana‘o no nā nīnau ‘elua. E ho‘okomo nō ho‘i ke kumu i kekahi mau mana‘o i mea e pa‘a pono ai kēia mau hua ‘ōlelo ‘elua.
 - Maiiau: He hua ‘ōlelo kēia e wehewehe ai i ke ‘ano o ka mālama kūpono loa o ka po‘e kūpuna. Inā he hana i hana maiiau ‘ia, kūpono loa ka ho‘okō ‘ia o nā koina a pau o ia hana. Ma Ka Papa Lo‘i ‘O Kānewai e mālama maiiau ‘ia ai ka ‘āina. Na ka ‘āina nā kupa i a‘o i nā lōina kūpono i mālama pono ‘ia ‘o Kānewai. E komo kākou i ka mo‘okū‘auhau o nei wahi me ka mālama pū i nā lōina like o ko ‘ane‘i po‘e limahana.
 - Ma‘ema‘e: He hua ‘ōlelo kēia e wehewehe ai i ka hopena o ka hana maiiau. Inā maiiau ka hana, ma‘ema‘e ka hopena o ka hana. Pehea Ka Papa Lo‘i ‘O Kānewai? Ua ma‘ema‘e anei? E nānā kākou iā Hāloa, no ka mea, nāna e hō‘ike mai i ka ma‘ema‘e a me ka ‘ole o kona wahi noho. Ma ko kākou māka‘ika‘i ‘ana i ‘ane‘i, e ahuwale ana ka maiiau o ka po‘e limahana a me ka ma‘ema‘e o ko lākou ‘āina. E lilo pū kākou i mau limahana e mālama maiiau ana i ka ‘āina.
 - Maiiau a ma‘ema‘e ke kanaka, ka ‘uhane, ka no‘ono‘o, ka wai, ka ‘āina, ka hana ma ka lo‘i a me i ka ho‘omākaukau mea ‘ai, a pēlā aku.
 - E ‘imi ‘oukou i nā paukū no kēia mau hua ‘ōlelo ma ka palapala ha‘awina...ma hea lāua? (Aia ka mea no maiiau ma kahi o ke po‘o wai a aia ka mea no ma‘ema‘e ma kahi o ka ho‘i wai.) He mana‘o ko ‘oukou no ke kumu o kēia ho‘onohonoho ‘ana? (Inā maiiau ka hana ma ke po‘o wai e ma‘ema‘e ka wai i ka ho‘i wai. Inā nō na‘e he nui loa nā lau e pani ana i nā ‘auwai a ‘a‘ole ma‘ema‘e nā ‘auwai, e emi loa ana ka wai ma nā lo‘i, e mālō‘o ana ‘o Hāloa, a e lepo ana ka wai e ho‘i ana i ke kahawai. No laila, he kuleana ko kākou a pau e hana me ka maiiau i ma‘ema‘e

Ka Papa Lo‘i ‘O Kānewai (ka papa ha‘awina no ke kumu a‘o)

ka hopena o ka hana a i ma‘ema‘e mau ka ‘āina a me ka wai no nā hanauna e hiki mai ana.)

Nā Ki‘i Kahiko

E ha‘i ke/nā kumu i nā haumāna—Ho‘omana‘o ‘oukou i nā ki‘i kahiko o Waikīkī? Like ka ‘āina i ka wā kahiko me ka ‘āina i kēia manawa? ‘A‘ole loa. Pehea i ‘oko‘a ai--he aha nā ‘ōlelo a Kupuna Olivera? Ma mua, nui ka wai, ke kalo, a me ka laiki ma Waikīkī, akā, i kēia manawa, nui nā hale a me nā alanui. Ua kūkulu ‘ia nā hale, ua ho‘opiha ‘ia nā kahawai/pūnāwai/muliwai, a ua ‘eli ‘ia ke Ala Wai. Pehea ‘o Kānewai? Ua loli ka ‘āina ma ‘ane‘i kekahi? ‘Ae. E nānā i kēia mau ki‘i—he aha ke ‘ano o ka ‘āina i ka wā kahiko? Pehea i kēia manawa?

Pili Ka ‘Āina a me Ke Kai

- Aia ka papa lo‘i kalo o Kānewai i uka a aia ka muliwai o Waikīkī i kai ma kahi o ka Hale Hō‘ike‘ike I‘a o Waikīkī. ‘Ano mamao nā wahi ‘elua akā pili ka lo‘i kalo a me ka muliwai. No ke aha? Pehea e pili ai?—ka wai (kahe ka wai mai uka a i kai, mai ka papa lo‘i kalo a i ka muliwai).
- Ho‘omana‘o ‘oukou i nā ‘ōlelo a Kupuna Olivera? Wahi āna, mai hea mai ka wai i komo i ke kai o Waikīkī i kona wā kamali‘i? (‘Ae, mai Mānoa me Pālolo.) ‘Oko‘a paha ke kahe ‘ana o ka wai i kēia manawa? (‘Oko‘a ma kekahi ‘ano ma muli o nā hale a me nā alanui i kūkulu ‘ia, akā, mai Mānoa me Pālolo mai nō ka wai e komo mau ana i ke kai o Waikīkī i kēia mau lā. No laila, pili ka papa lo‘i kalo o Kānewai i ka muliwai o Waikīkī, no ka mea, kahe ka wai i ke kahawai ma Mānoa, komo i loko o ka papa lo‘i kalo o Kānewai, ho‘i i ke kahawai, noke i ke kahe ‘ana i kai a hui me ke kai ma ka muliwai o Waikīkī. A like ka huaka‘i ‘ana a ka wai mai Pālolo a i Waikīkī kekahi.)
- Ho‘omana‘o ‘oukou i nā mea pa‘ahana i kau lewa ia ma ka Hale Hō‘ike‘ike I‘a o Waikīkī? He aha nā mea e pono ai ka hana ‘ana i nā mea pa‘ahana? Pono nā lā‘au o ka ‘āina a me nā i‘a o ke kai (ke kīholo, ka ‘upena, a pēlā aku). No laila, pili ka ‘āina a me ka kai? ‘Ae.

9:30am – 10:30am

E alaka‘i ka/nā limahana o Kānewai i ka māka‘ika‘i ‘ana i nā māhele like ‘ole o ka papa lo‘i kalo mai ke po‘o wai a i ka ho‘i wai. Inā lawa ka manawa a mākaukau nā haumāna, e lilo pū lākou i mau limahana o Kānewai ma o ka mālama mai i ‘ana i ka ‘āina.

E Ho‘ā‘o Mai!

E ha‘i ke/nā kumu i nā haumāna—Iā kākou e kipa ana i Ka Papa Lo‘i ‘O Kānewai, e hehi pū ana ko kākou mau wāwae i ke kapua‘i kupuna i waiho ‘ia e nā hulu mamo o ke au ma mua.

Ka Papa Lo‘i ‘O Kānewai (ka papa ha‘awina no ke kumu a‘o)

‘A‘ole ia mau meheu i mau hehina kāpulu. I waiho maiāu ‘ia nō me ka mana‘o e ma‘ema‘e loa ka ‘āina i ka po‘e nona ia mau kapua‘i. Ma kēia huaka‘i, e ho‘omāka‘ika‘i ‘ia ana kākou e ko Kānewai me ka ho‘okuleana pū ‘ia ‘ana o kākou e mālama i kēia wahi e like me ka po‘e mua o nei ‘āina.

Mai ke po‘o wai a i ka ho‘i wai, e maka‘ala ‘oukou i ka ma‘ema‘e o ka ‘āina a me nā lōina maiāu o nā limahana o Kānewai pili i nā māhele like ‘ole o ka papa lo‘i kalo. Inā e kāpulu kā kākou hana ma ‘ane‘i, he haumia a he lepo nō ho‘i ka hopena a ‘a‘ohe hua momona e loa‘a mai ana iā kākou. No laila, e ho‘oma‘ema‘e kākou me ka maiāu e like me ka po‘e nona kēia wahi.

He Ha‘awina—Nā Māhele o ka Lo‘i a me Nā Lōina Maiāu o Ko Kānewai

- I ke kipa ‘ana i kēlā me kēia māhele o ka lo‘i, e wehewehe ko Kānewai i ke ‘ano o nā māhele a me nā hana a lōina maiāu o lākou pili i kēlā me kēia māhele. Na ke kumu e paipai i nā haumāna e nānā pono i ke ‘ano o kēlā me kēia māhele. Eia ke ‘ano o nā nīnau e ulu ai ka no‘ono‘o o nā haumāna:
 - He aha kēia (*e kuhikuhi i ka māhele*)? He aha ka inoa o kēia māhele o ka lo‘i?
 - I wahi aha ka ____?
 - He **kahawai** kēia. ‘O Mānoa kona inoa. I wahi ke kahawai e kahe ai ka wai mai uka a i kai.
 - He **māno wai** kēia. I wahi ka māno wai e ho‘omana ai i ke kahawai.
 - He **po‘o wai** kēia. I wahi ke po‘o wai e komo mua ai ka wai i ka ‘auwai.
 - He **‘auwai** kēia. I wahi ka ‘auwai e ho‘okahe ai i ka wai mai ke po‘o wai a nā lo‘i.
 - He **makawai** kēia. I wahi ka makawai e komo ai ka wai i ka lo‘i a e ha‘alele aku ai ho‘i ka wai i ka lo‘i.
 - He **kuāuna** kēia. I wahi ke kuāuna e pa‘a pono ai nā lo‘i i ‘ole e kulu ka wai i waho.
 - He **ho‘i wai** kēia. I wahi ka ho‘i wai e ho‘i ai ka wai i ke kahawai.
 - ‘O ka **papa lo‘i kalo** kēia ‘o Kānewai. I wahi ka papa lo‘i kalo e ulu ai ke kal. A i wahi ka papa lo‘i kalo ‘o Kānewai e ola ai nā mamo a Hāloa.
 - He aha ke ‘ano o ka ____ ke nānā aku? (e la‘a: no ka māno wai—paepae ‘ia nā pōhaku a ho‘opa‘a ‘ia me ke kimeki; he lepo ke ‘ano o nā kuāuna; pu‘epu‘e ke ‘ano o ke kanu ‘ana i nā huli; a pēlā aku) He aha nā hana/lōina maiāu o nā limahana o Kānewai pili i ka ____? (e la‘a: no ke po‘owai, hiki ke pani ‘ia me ka pōhaku i lohi ke kahe ‘ana o ka wai i ka ‘auwai a i ‘ole hemo ka pōhaku i piha ka ‘auwai i ka wai a kahe wikiwiki nō ho‘i ka wai i nā lo‘i).
 - Ua hele mua ‘oukou i kekahi papa lo‘i kalo ma kahi ‘ē? Inā ‘ae, he aha ke ‘ano o ka ____ ma laila? ‘Oko‘a paha, ‘a‘ole paha? Inā ‘oko‘a, no ke aha? (‘Oko‘a paha

ka hana/loina ma laila, ‘oko‘a paha ka hana ma Kānewai, no ka mea, ‘oko‘a nā ‘āina ‘elua. ‘Oko‘a paha nā loina/hana ma nā ‘āina ‘elua, akā waiwai nā mea a pau, no ka mea, pili a kūpono ka hana/loina i ke ‘ano o ka ‘āina. Akamai a maiāu nā kūpuna no nā ‘āina a pau o Hawai‘i nei, no ka mea, ua ho‘okama‘āina lākou i ke ‘ano o ko lākou ‘āina a kama‘āina a koho ‘ia nā hana/loina e pono ai kēlā ‘ano ‘āina i lawa ka ‘ai, ka wai, a me ka i‘a e hānai ai i nā kupa‘āina.

- Pehea e ho‘okama‘āina ai i ka ‘āina? Ma o ka ‘ike maka a me ka lohe pepeiao i ka ‘āina a me nā kūpuna o ka ‘āina. Ma o nā mo‘olelo no ka ‘āina. Ma o ka huli ‘ana i nā lima i lalo a me ka hana ‘ana me nā kupa o ka ‘āina. Na ka ‘āina a me nā kūpuna o ka ‘āina e hō‘ike i nā hana a me nā loina kūpono, no laila, e hāmau ko kākou leo, e ho‘olohe ko kākou pepeiao, a e maka‘ala i ‘ike a lohe ‘ia lākou a i pā nō ka na‘au iā lākou.

- [Inā lawa ka manawa a mākaukau nā haumāna](#): Ma hope o ke kipa ‘ana i nā māhele like ‘ole o ka papa lo‘i kalo, e komo nā haumāna i ka hana—e ‘ohi‘ohi ‘ia nā lau pala, e hehi ‘ia nā lau i ka lo‘i, e huki ‘ia ke kalo, e kaka ‘ia a ma‘ema‘e nā huli, e kōhi ‘ia a pau, a e kanu ‘ia nā huli.

E Hō‘ike Mai!

Ka Ma‘ema‘e o Kānewai

E ha‘i ke/nā kumu i nā haumāna—Ua ‘ike maka aku nei ‘oukou i nā māhele like ‘ole o ka papa lo‘i kalo a me nā loina maiāu o nā limahana o Kānewai pili i ia mau māhele. Ua huli nō ho‘i ko ‘oukou mau lima i lalo ma o ka ‘ohi ‘ana i nā lau pala a me ka hehi ‘ana i nā lau i ka lo‘i. No laila, ua hiki mai ka manawa e hō‘ike ai i ko ‘oukou mau mana‘o no...

- ke ‘ano o nā māhele o ka papa lo‘i kalo o Kānewai
- nā hana a me nā loina maiāu o nā limahana o Kānewai
- ke ko‘iko‘i o ka hana maiāu a ma‘ema‘e ma Kānewai

Eia kekahi—E kipa ana kākou i kekahi papa lo‘i kalo ‘oko‘a i ka hopena o kēia huaka‘i nui ‘o Welina Mānoa a e ho‘ohālikelike ana ‘oukou i ke ‘ano o kēlā papa lo‘i kalo me ke ‘ano o Ka Papa Lo‘i ‘O Kānewai. No laila, e kākau a kaha ki‘i paha i ka ‘ao‘ao hope loa o ka palapala ha‘awina i kou mau mana‘o a me nā mana‘o o nā hoa papa no Kānewai i ‘ole e poina.

10:30am – 11:00am

Ma mua o ka pā‘ina awakea ‘ana ma lalo o ka hale pe‘a, e ho‘omana‘o ke/nā kumu i nā haumāna—‘O Ka Papa Lo‘i ‘O Kānewai kahi a Hāloa e noho ai a ‘o ia ko kākou kupuna. He aha ke ‘ano o ka leo a me ka hana i mua o ka po‘e kūpuna? Hāmau ka leo a mālie ka hana, ‘eā, i ‘ole

Ka Papa Lo‘i ‘O Kānewai (ka papa ha‘awina no ke kumu a‘o)

e ho‘oluhi iā lākou a i lohe ‘ia ko lākou mau mo‘olelo. No laila, pēlā kā kākou hana ‘oiai kākou e pā‘ina awakea ana ma kahi o Hāloa.

Ma Hope o ka Huaka‘i

I ka ho‘i ‘ana i ke kula...

- E kākau nā haumāna e pili ana i ka huaka‘i ‘ana i ka Papa Lo‘i ‘O Kānewai i mea e pa‘a pono ai ko lākou mau mana‘o no nā mea i a‘o ‘ia.
- Eia nā nīnau a lākou e pane ai (nā nīnau ma nā paka ua ‘ekolu i ka ‘ili hope o ka palapala ha‘awina):
 1. Pili Ka Papa Lo‘i ‘O Kānewai i ke kai o Waikīkī? Pehea e pili ai?
 2. No ke aha i mana‘o ‘ia ai he mea ko‘iko‘i ka mālama ‘ana i ka ma‘ema‘e o ka wai?
 3. He kuleana ko kākou e hana me ka maiau a ma‘ema‘e. Pehea ‘oe e ho‘okō ai i ia kuleana ma ke kula a me ka hale?